

14 MAR 1996

PASANGAN DIRAJA SWEDEN BERANGKAT KE SABAH UNTUK LAWATAN TIGA HARI

KUALA LUMPUR, 14 Mac (Bernama) -- Raja Carl Gustaf dan Permaisuri Silvia hari ini berangkat ke Kota Kinabalu untuk lawatan negara selama tiga hari ke Sabah.

Yang di-Pertuan Agong Tuanku Jaafar dan Raja Permaisuri Agong Tuanku Najihah berada di perkarangan Bangunan Parlimen untuk mengucapkan selamat berangkat.

Yang turut hadir ialah Putera Carl Philip, Menteri Luar Datuk Abdullah Ahmad Badawi dan Menteri Pembangunan Usahawan Datuk Mustapa Mohamed selaku Menteri Pengiring.

Raja Sweden itu sebelumnya menerima tabik hormat daripada 103 anggota dan empat pegawai Rejimen Askar Melayu Diraja (RAMD) Sungai Besi pimpinan Mejar Rafizi Shariff perkarangan Bangunan Parlimen.

Pancaragam Pusat RAMD di bawah pimpinan Lt Norman Kamarudin kemudian memainkan lagu kebangsaan kedua-dua negara.

Rombongan diraja itu meninggalkan perkarangan Parlimen pada pukul 9.15 pagi menuju ke Lapangan Terbang Sultan Abdul Aziz Shah, Subang.

Terdahulu, Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohd Ali menghadap Raja Carl Gustaf dan Permaisuri Silvia di Carcosa Seri Negara di sini untuk mengucapkan selamat berangkat.

Sementara itu, Raja Carl Gustaf dan Permaisuri Silvia diberi sambutan permaidani merah setibanya di Lapangan Terbang Antarabangsa Kota Kinabalu untuk lawatan negara selama tiga hari ke Sabah.

Keberangkatan tiba pasangan diraja itu yang diiringi oleh Putera Carl Philip disambut oleh Timbalan Ketua Menteri Datuk Yong Teck Lee dan isteri Datin Stella Yong.

Rombongan diraja kemudian berkereta ke bangunan Yayasan Sabah di Likas dekat sini. Di sana, pelawat diraja dari Sweden itu diberi sambutan tradisional yang berwarna-warni.

Raja Gustaf dan Permaisuri Silvia kemudian diraikan pada santapan tengah hari di restoran berpusing di tingkat 18 bangunan itu sebelum berangkat ke Tawau.

Permaisuri Silvia pula mempunyai aturcara persendirian dengan melawat ke Lembah Danum yang kaya dengan spesis flora dan fauna.

Pelawat diraja itu akan kembali ke Kota Kinabalu pada Sabtu dan melawat Pulau Manukan sebelum ke Bangkok dalam perjalanan pulang. -- BERNAMA

KG FAZ